



*Jumat, 01 Oktober 2021*

**Ogen: Esekiel 16:1-14**



**“Kupebelin-belin Kam”**



**I**bas pebelin-belin anakna, biasana orangtua mereken gegeh ras kengasupenna guna pebelin-belin anakna e. Seh maka, orangtua pe nggit ndayaken kai si lit bas ia segelah tersehi kerina sura-sura anakna e. Mbelin tuhu pengorbanen orangtua nandangi anakna. Kitab Ezekiel 16 enda nuriken kerna kegeluhen kalak Jerusalem si la bagi sura-sura Dibata. Kekelengen si mbelin nggo ibereken Dibata segelah kalak Jerusalem e ngasup ndalani kegeluhenna bagi si ngena ate Dibata. Pengorbanen si nggo ibereken Dibata guna ngkelengi bangsa e la iergaken, la ipatuhi kalak Jerusalem ndai. Bali bagi judul perikop bas Ezekiel 16 enda "*Jerusalem kuta si la patuh*" mereken gambaren man banta, segedang-gedang kegeluhen kalak Jerusalem nggo isikapken Dibata. Ikawali Dibata kegeluhenna e, ibereken Dibata kai sinisuraken kalak Jerusalem e. Tapi, sitik pe kalak Jerusalem e lanai setia nandangi Dibata. Ipebelin-belin Dibata kerna kegeluhen Jerusalem. Ipujiken Dibata, seh maka gelah mehaga iakapna kegeluhenna e amin gia melala kiniseran si ibentasinana. Uga kita? Ise nge si pebelin-belin kita bas kegeluhenta enda. Orangtuanta (baik si nggeluh denga bagepe si lanai lit) jadi alat Dibata guna pebelin-belin kita. Biak Dibata e jadi usihen man orangtua guna pebelin-belin anakna. Labo lit orangtua si atena ndabuhkan anakna ku kegelapen. Tapi sebaliknya, orangtua pasti ngepkep anak-anakna guna ndalani kegeluhenna bagi si ngena ate Dibata seh maka gelar Dibata tetap termulia bas kegeluhenna. Tema ta wari enda ercakup kerna *Kupebelin-belin kam*, Dibata mpebelin-belin bangsaNa, bangsaNa e harus ngergaken kerna kerina pengorbanen kekelengen si icidahken Dibata man bana. Enda me jadi dalam man banta i bas kita nehken kekelengen Dibata antara orangtua ras anak, anak ras orangtua, sabap Dibata nggo ncidahken uga IA mpebelin-belin kita manusia selaku tinepaNa.